

四庫全書

集部

欽定四庫全書

詞綜卷十九

翰林院檢討朱彝尊編

宋詞六十六首

吳文英 四十五首

蔣捷 二十一首

吳文英

字君特四明人從吳穀夫遊有夢窓甲乙丙丁稿四卷

張叔夏云吳夢窓如七寶樓臺眩人眼目折碎下來不成片段 尹惟晚云求詞於吾宋前有清真後有夢窓此非予之言四海之公言也 沈伯時云夢窓深得清真之妙但用

事下語太晦
處人不易知

倦尋芳

錢周糾定夫

暮帆挂雨水岸飛梅春思零亂送客將歸偏是故宮離
苑醉酒曾同涼月舞尋芳還隔紅塵面去難留悵芙蓉
路窄綠楊天遠便繫馬鶯邊清曉烟草晴花沙潤香
軟爛錦年華誰念故人遊倦寒食相思堤上路行雲應
在孤山畔寄新吟莫空回五湖春鴈

又

花翁遇舊歡吳門老妓李憐邀分韻同賦此詞

墜瓶恨井塵鏡迷樓空閑孤燕寄別崔徽清瘦畫圖春
面不約舟移楊柳繫有緣人映桃花見叙分攜悔香瘢
謾熱綠鬟輕剪聽細語琵琶幽怨客鬢蒼華衫袖濕
徧漸老芙蓉猶自帶霜重看一縷情深朱戶掩兩痕愁
起青山遠被西風又驚吹夢雲分散

又上元

海霞倒影空霧飛香天市催晚暮靨宮梅相對畫樓簾
捲羅襪輕塵花笑語寶釵爭掩春心眼亂簫聲正風柔

柳弱舞肩交燕 念窈窕東鄰深巷燈外歌沉月上花
淺驚夢離雲點點漏壺清怨珠絡香消空念往紗窗人
老羞相見漸銅壺閉春陰曉寒人倦

燭影搖紅

餞馮深居翼日深居初度

飛蓋西園晚秋恰勝春天氣霜花開盡錦屏空紅葉新
裝綴時放清杯泛水暗淒涼東風舊事夜吟不就松影
闌干月籠寒翠 莫唱陽關但憑彩袖歌千歲秋星入
夢隔明朝十載吳宮會一棹回潮渡葦正西窗燈花報

喜柳蠻櫻素試酒爭憐不教不醉

法曲獻仙音

和丁宏庵韻

落葉霞翻敗窻風咽暮色淒涼深院瘦不關秋淚綠生
別情銷鬢霜千點悵翠冷搔頭燕那能語恩怨紫簫
遠記桃枝向隨春渡愁未洗鉛水又將恨染粉縞澀離
箱恁重拈燈夜裁剪望極藍橋彩雲飛羅扇歌斷料鸚
籠玉鎖夢裏隔花時見

憶舊游

別黃泥翁

送人猶未苦苦送春隨人去天涯片紅都飛盡陰陰潤
綠暗裏啼鴉賦情頓雪雙鬢飛夢逐塵沙歎病渴淒涼
分香瘦減兩地看花 西湖斷橋路想繫馬垂楊依舊
欹斜葵麥迷烟處問離巢孤燕飛過誰家故人為寫深
怨空壁掃秋蛇但醉上吳臺殘陽草色歸思賒

點絳脣 懷蘇州

明月茫茫夜來應照南橋路夢遊熟處一枕啼秋雨
可惜人生不向吳城住心期誤鴈將秋去天遠青山暮

又 試燈夜初晴

捲盡愁雲素娥臨夜新梳洗
暗塵不起酥潤淩波地
輦路重來彷彿燈前事情如水
小樓薰被春夢笙歌裏

又

推枕南窓棟花寒入單紗淺
雨簾不捲空礙調雛燕
一握柔蔥香染榴巾汗音塵斷
畫羅閑扇山色天涯遠

又

時霎清明載花不過西園路
嫩陰綠樹正是春留處

燕子重來往事東流去征衫貯舊寒一縷淚濕風簾絮

西子妝

夢窓自度腔湖上清明薄遊

流水麴塵艷陽酪酒畫舸遊情如霧笑拈芳草不知名
乍凌波斷橋西堦垂楊謾舞總不解將春繫住燕歸來
問綵繩纖手如今何許歡盟誤一箭流光又趁寒食
去不堪衰鬢著飛花傍綠陰冷烟深樹玄都秀句記前
度劉郎曾賦最傷心一片孤山細雨

唐多令

何處合成愁。離人心上秋。縱芭蕉不雨也飈飈。都道晚涼天氣好。有明月。怕登樓。年事夢中休。花空烟水流。燕辭歸客尚淹留。垂柳不繫裙帶住。謾長是繫行舟。張叔夏云此詞疎快不質實

玉漏遲

中秋

鴈邊風訊小。飛瓊望杳。碧雲先晚露。冷闌干。定怯藕絲冰腕。淨洗浮雲片。玉勝花影春燈相亂。秦鏡滿。素娥未肯分秋一半。每圓處。即良宵甚此夕。偏饒對歌臨怨。

萬里嬋娟幾許霧屏雲幔孤兔淒涼照水曉風起銀河
西轉摩淚眼瑤臺夢回人遠

祝英臺近

除夜立春

剪紅情裁綠意花信上釵股殘日東風不放歲華去有
人添燭西窓不眠侵曉笑聲轉新年鶯語舊樽俎玉
纖曾擘黃柑柔香繫幽素歸夢湖邊還迷鏡中路可憐
千點吳霜寒銷不盡又相對落梅如雨

又

春日客龜溪游廢園

采幽香巡古苑竹冷翠微路關草溪根沙印小蓮步自
憐兩鬢清霜一年寒食又身在雲山深處 晝閑度因
甚天也慳春輕陰便成雨綠暗長亭歸夢趁風絮有情
花影闌干鶯聲門徑解留我霎時凝竚

又
上元

晚雲開朝雪霽時節又燈市夜約遺香南陌少年事笙
簫一片紅雲飛來海上繡簾捲綳桃春起 舊遊地素
娥城闕年年新妝趁羅綺玉練冰輪無塵浣流水曉霞

紅處啼鴉良宵一夢畫堂正日長人睡

霜花腴

重陽前一日汎石湖

翠微路窄醉晚風憑誰為整欵冠霜飽花腴燭銷人瘦
秋光做也都難病懷強寬恨鴈聲偏落歌前記年時舊
宿淒涼暮烟秋雨野橋寒妝壓鬢英爭艷度清商一
曲暗墜金蟬芳節多陰蘭情稀會晴暉稱拂吟箋更移
畫船引珮環邀下嬋娟算明朝未了重陽紫萸應耐看

喜遷鶯

同丁基仲過希道家看牡丹

凡塵流水正春在絳闕瑤階十二暖日明霞天香盤錦
低映曉光梳洗故苑浣花沉恨化作天紅斜紫困無力
倚闌干還倩東風扶起公子留意處羅蓋牙籤一一
花名字小扇翻歌密圍留客雲葉翠溫羅綺灩灩紫金
盃重人倚妝臺微醉夜和露剪殘枝點點花心清淚

又 福山蕭寺歲除

江亭年暮趁飛鴈又聽數聲柔櫓藍尾杯單膠牙餠淡
重省舊時羈旅雪舞野梅籬落寒擁漁家門戶晚風峭

做初番花信春還知否 何處園艷冶紅燭畫堂博簫
良宵午誰念行人愁先芳草輕送年華如羽自別短檠
不睡空索彩桃新句便歸好料鶯黃已涖西池千縷

聲聲慢

閨重九飲郭園

檀藥金碧婀娜蓬萊遊雲不蘸芳洲露柳霜蓮十分點
綴殘秋新彎畫眉未穩似含羞低度牆頭愁送遠駐西
臺車馬共惜臨流 知道池亭多宴掩庭花長是驚落
秦謳膩粉闌干猶聞凭袖香留輸他翠連拍甃瞰新妝

終日凝眸簾半捲帶黃花人在小樓

又 餞魏繡使泊吳江為友人賦

旋移輕鷁淺傍垂虹還因送客遲留淚雨橫波遙山眉
上新愁行人倚欄心事問誰知只有沙鷗念聚散幾楓
丹霜渚萼綠春洲漸近香菰炊黍想紅絲織字未遠
青樓寂寞漁鄉爭如連醉溫柔西窓夜深剪燭夢頻生
不放雲收共悵望認孤烟起處吳舟

高陽臺 落梅

宮粉彫痕仙雲墮影無人野水荒灣古石埋香金沙鎖
骨連環南樓不恨吹橫笛恨晚風千里關山半飄零庭
上黃昏月冷闌干壽陽宮裏愁鸞鏡問誰調玉髓暗
補香瘢細雨歸鴻孤山無限春寒離魂難倩招清些夢
縞衣解珮溪邊最愁人啼鳥晴明葉底清圓

又豐樂樓

修竹凝妝垂楊駐馬憑欄淺畫成圖山色誰題樓前有
鴈斜書東風緊送斜陽下弄舊寒晚酒醒餘自消凝能

幾花前頓老相如 傷春不在高樓上在燈前敝枕雨
外熏爐怕艤遊船臨流可奈清癯飛紅若到西湖底攪
翠瀾總是愁魚莫重來吹盡香綿淚滿平蕪

滿江紅

澱山湖

雲氣樓臺分一派滄浪翠蓬開小景玉盆寒浸巧石盤
松風送流花時過岸浪搖晴練欲飛空箕鮫宮祇隔一
紅塵無路通 神女驚凌曉風明月低響丁東對兩蛾
猶鎖怨絲烟中秋色未教飛盡鴈夕陽長是墜疎鐘又

一聲款乃過前岩移釣篷

遶佛閣

暗塵四斂樓觀迥出高映孤館清漏將短厭聞夜久籤
聲動書幔桂花又滿閒步露草偏愛幽遠花氣清婉望
中迤邐城陰度河岸倦客最蕭索醉倚斜陽穿柳綫
還似汴隄虹梁橫水面看浪颺春燈舟下如箭此行重
見歎故友難逢羈思空亂兩眉愁向誰舒展

解語花

梅花

門橫皺碧路入蒼烟春近江南岸暮寒如剪臨溪影一
一半斜清淺飛霞弄晚蕩千里暗香平遠端正看瓊樹
三枝總似蘭昌見 酥瑩雲容夜暖伴蘭麝清瘦蕭鳳
柔婉冷雲荒翠幽棲久無語暗申春怨東風半面料準
擬何郎詩卷歡未闌烟雨青黃宜晝陰庭館

荔支香近

七夕

輕睡時聞晚鵲噪庭樹又說今夕天津西畔重歡遇蛛
絲暗鎖紅樓燕子穿簾處天上侶比人間更情苦 秋

鬢改妒月妹長眉嫵過雨西風數葉井梧秋舞夢入藍
橋幾點疎星映朱戶淒濕沙邊凝竚

尉遲杯

賦楊公小蓬萊

垂楊逕洞鑰啓時遣流鶯迎涓涓暗谷流紅應有細桃
千頃臨池笑靨春色滿銅華弄妝影記年時試酒湖陰
褪花曾采新杏珠窓繡網玄經纔石研開奩雨潤雲
凝小小蓬萊香一掬愁不到朱嬌翠靚清樽伴人間日
永斷琴和棋聲竹露冷笑從前醉卧紅塵不知仙在人

境

霜葉飛

重九

斷烟離緒關心事斜陽紅隱霜樹半壺秋水薦黃花香
喫西風雨縱玉勒輕飛迅羽淒涼誰弔荒臺古記醉踏
南屏彩扇咽寒蟬倦夢不知蠻素聊對舊節傳杯塵
箋蠹管斷關經歲慵賦小蟾斜影轉東籬夜冷殘蛩語
早白髮緣愁萬縷驚飈從捲烏紗去謾細將茱萸看但
約明年翠微高處

瑞鶴仙

淚荷拋碎壁正漏雲篩雨斜捎窓隙林聲怨秋色對小山不迭寸眉愁碧涼欺岸幘暮砧催銀屏剪刀最無聊燕去堂空舊幕暗塵羅額行客西園有分斷柳淒花似曾相識西風破屐林下路水邊石念寒蛩殘夢歸鴻心事那聽江村夜笛看雪飛蘋底蘆梢未如鬢白

又 贈道女陳華山內夫人

彩雲棲翡翠聽鳳笙吹下飛鞚天際晴霞剪輕袂澹春

姿雪態寒梅清泚東皇有意旋安排
闌干十二早不知
為雲為雨盡日建章門閉
堪比紅綃纖素紫燕輕盈
內家標致游仙舊事星斗下
夜香裏少華峯頭有紙屏
橫幅春色長供午睡更醉乘玉井
秋風采花弄水

齊天樂

新烟初試花如夢疑收楚峯殘雨
茂苑人歸秦樓燕宿
同惜天涯為旅遊情最苦
早柔絲迷津亂莎荒圃
數樹梨花晚風吹墮半汀鷺
流紅江上去
遠翠樽曾共醉

雲外別墅淡月秋千幽香巷陌愁結傷春深處聽歌看
舞駐不得當時柳蠻櫻素睡起慙慙洞簫誰院宇

又

烟波桃葉西陵路十年斷魂潮尾古柳重攀輕鷗驟別
陳迹危亭獨倚涼颼乍起渺烟磧飛帆暮山橫翠但有
江花共臨秋鏡照憔悴華堂燭暗送客眼波回盼處
芳艷流水素骨凝冰柔蔥蘢雪猶憶分瓜深意清樽未
洗夢不濕行雲漫沾殘淚可惜秋宵亂蛩疎雨裏

掃花遊

送春古江村

水園沁碧驟夜雨飄紅竟空林島艷春過了有塵香墜
鈿尚遺芳草步繞新陰漸覺交枝逕小醉深窈愛綠葉
翠圓勝看花好芳架雪未掃怪翠被佳人困迷清曉
柳絲繫棹問閭門自古送春多少倦蜨慵飛故撲簪花
破帽酹殘照掩重城暮鐘不到

瑞龍吟

德清清明競渡

大溪面遙望繡羽衝烟錦梭飛練桃花三十六陂鮫宮

睡起嬌雷乍轉 去如箭催趁戲旗遊鼓素瀾雪濺東
風冷濕鮫腥淡陰送畫輕霏弄晚 洲上青蘋生處闌
春不管懷沙人遠殘日半開一川花影零亂山屏醉纈
連掉東西岸闌干倒千紅妝靨鉛香不斷傍暝疎簾捲
翠連皺淨笙歌未散萸柳嬌桃嬾猶自有玉龍黃昏吹
怨重雲暗閣春霖一片

解蹀躞

醉雲又兼醒雨楚夢時來往倦蜂剛著梨花惹游蕩還

做一段相思冷波葉舞愁紅送人雙漿 暗凝想情共
天涯秋黯朱橋鎖深巷會稀投得輕分頓惆悵此去幽
曲誰來可憐殘照西風半妝樓上

玉樓春

京市舞女

茸茸狸帽遮梅額金蟬羅剪胡衫窄乘肩爭看小腰身
倦態強隨閑鼓笛 問稱家住城東陌欲買千金應不
惜歸來困頓端春眠猶夢婆娑斜趁拍

深蘭香

淮安重午

盤絲繫腕巧篆垂簪玉隱紺紗睡覺銀瓶露井彩簾雲
窓往事少年依約為當時曾寫榴裙傷心紅綃褪芳忝
夢光陰漸老汀洲烟弱莫唱江南古調怨抑難招楚
江沈魄薰風燕乳暗雨梅黃午鏡深蘭簾幕念秦樓也
擬人歸應剪菖蒲自酌但悵望一縷新蟾隨人天角

惜紅衣

余從姜石帚遊苕霅間三十五年矣重來
傷今感昔聊以詠懷

鷺老秋絲蘋愁暮雪鬢那太白倒柳移栽如今暗溪碧
烏衣細語傷伴惹茸紅曾約南陌前度劉郎尋流花踪

跡朱樓水側雲面波光汀蓮沁顏色當時醉近繡箔
夜吟寂三十六磯重到清夢冷雲南北買釣舟溪上應
有烟蓑相識

風入松

聽風聽雨過清明愁草瘞花銘樓前綠暗分攜路一絲
柳一寸柔情料峭春寒中酒交加曉夢啼鶯西園日
日掃林亭依舊賞新晴黃蜂頻撲秋千索有當時纖手
香凝惆悵雙鴛不到幽階一夜苔生

鶯啼序

殘寒正欺病酒掩沉香繡戶燕來晚飛入西城似說春
事遲暮畫船載清明過却晴烟冉冉吳宮樹念羈情遊
蕩隨風化為輕絮十載西湖傍柳繫馬趁嬌塵輕霧
溯紅漸招入仙溪錦兒偷寄幽素倚銀屏春寬夢窄斷
紅濕歌紈金縷暝堤空輕把斜陽總還鷗鷺幽蘭旋
老杜若還生水鄉尚寄旅別後訪六橋無信事往花萎
瘞玉埋香幾番風雨長波妒眇遙山羞黛漁燈分影春

江宿記當時短楫桃根渡青樓彷彿臨分敗壁題詩淡
墨慘淡塵土危亭望極草色天涯歎鬢侵半苧暗點
檢離痕歡唾尚染鮫綃鳳迷歸破鸞慵舞殷勤待寫
書中長恨藍霞遼海沈過鴈謾相思彈入哀箏柱傷心
千里江南怨曲重招斷魂在否

玉漏遲

絮花寒食路晴絲罥日綠陰吹霧客帽欺風愁滿畫船
烟浦綵挂秋千散後悵塵鎖燕簾鶯戶從間阻夢雲無

準鬢霜如許 夜久繡閣藏嬌記 掩扇傳歌剪燈留語
月約星期細把花鬢頻數彈指一襟怨恨謾空倩啼鵲
聲訴深院宇黃昏杏花微雨

金盞子

吳城連日賞桂一夕風雨悉已零落獨寓
憲晚花方作小蕾未及見開遂有新邑之
役竭來西館籬落間嫣然一枝可愛見侶
人而喜為賦此解

賞月梧園恨廣寒宮樹晚風搖落莓砌掃蛛塵空腸斷
薰爐燼消殘夢殿秋尚有餘花鎖烟窓雲幄新鴈又無
端送人江上短亭初泊 籬角夢依約人一笑惺忪翠

袖薄悠然醉魂喚醒幽叢畔淒香霧雨漠漠晚吹乍顫
秋聲早屏空金雀明朝想猶有數點蜂黃伴我斟酌

絳都春

余往來清華池館六年賦詠屢以感昔傷
今益不堪懷乃復作此解

春來鴈渚弄艷冶又入垂楊如許困舞瘦腰啼濕宮黃
池塘雨碧沿蒼蘚雲根路尚追想凌波微步小樓重上
憑誰為唱舊時金縷凝竚烟蘿翠竹欠羅袖為倚天
寒日暮強醉梅邊招得花奴來樽俎東風須惹春雲住
更莫把飛瓊吹去便教攜取熏籠夜溫繡戶

十二郎

垂虹橋上有垂虹亭屬吳江

素天際水浪拍碎凍雲不凝記曉葉題霜秋燈吟雨曾
繫長橋過艇又是賓鴻重來後猛賦得歸期纔定嗟繡
鴨解言香鱸堪釣尚廬人境幽興爭如共載月娥妝
鏡念倦客依前貂裘茸帽重向淞江照影酹酒蒼茫倚
歌平遠亭上玉虹腰冷迎醉面暮雪飛花幾點黛愁山
暝

蔣

捷

字勝欲義興人
有竹山詞一卷

賀新郎

渺渺啼鴉了。亘魚天、寒生峭嶼。五湖秋曉。竹几一鐙人。
做夢嘶馬誰行古道。起搔首、窺星多少。月有微黃籬無
影。挂牽牛數朶青花小。秋太淡、添紅棗。愁痕倚賴西
風掃。被西風、翻催鬢鬢與秋俱老。舊院隔霜簾不捲。金
粉屏邊。醉倒計無此。中年懷抱。萬里江南。吹簫恨恨參
差白鴈。橫天杪。烟未斂。楚山杳。

又

約友三月旦飯

鴈嶼晴嵐薄倚層屏千樹高低粉纖紅弱雲隘東風藏
不盡吹艷生香萬壑又散入汀蘅洲葯擾擾匆匆塵上
面看歌鶯舞燕逢春樂人共物知誰錯寶釵樓上圍
簾幕小嬋娟雙調彈箏半霄鸞鶴我輩中人無此分琴
思詩情當却也勝似愁橫眉角芳景三分才過二便綠
陰門巷楊花落沾斗酒且同酌

又

夢冷黃金屋歎秦箏斜鴻陣裏素絃塵撲化作嬌鶯飛

歸去猶認窻紗舊綠正過雨荆桃如菽此恨難平君知
否似瓊臺湧起彈碁局消瘦影嫌明燭 鴛樓碎瀉東
西玉問芳踪何時再展翠釵難卜侍把宮眉橫雲樣描
上生綃畫幅怕不是新來妝束綵扇紅牙今都在恨無
人解聽開元曲空掩袖倚寒竹

洞仙歌

對雨思友

世間何處最難忘杯酒惟是停雲想親友此時無一盞
千種離愁西風外長伴枯荷裒柳 去年深夜語傾倒

書窓窓燭心懸小紅豆記得到門時雨正蕭蕭嗟今雨
此情非舊待與子相期采黃花又未卜重陽果能晴否

又柳

枝枝葉葉受東風調弄便是鶯穿也微動自鶯黃千縷
數到飛綿閑無事誰管將春迎送輕柔心性在教得
遊人酒舞花吟恣狂縱更誰家鸞鏡裏貪學纖蛾移來
傍妝樓新種總不道江頭鎖清愁正雨渺烟茫翠陰如

夢

瑞鶴仙

鄉城見月

紺烟迷鴈跡，漸碎鼓零鐘，街喧初息。風檠背寒壁，放冰
蛸飛到，蛛絲簾隙。瓊魂暗泣。念鄉關、霜蕪似織。謾將身
化鶴歸來，忘却舊遊端的。歡極。蓮壺藻浸，花院梨溶，
醉連春夕。柯雲罷奕，櫻桃在夢，難覓勸清光，乍可幽窓
相伴。休照紅樓夜笛。怕人間、換譜伊涼，素娥未識。

白苧

正春晴，又春冷。雲低欲落，瓊苞未剖。早是東風作惡，旋

安排一雙銀蒜鎮羅幕幽壑水生漪皺嫩綠潛鱗初躍
惜惜門巷桃樹紅纔約畧知甚時霽華烘破青青萼
憶昨引蜨花邊近來重見身學垂楊瘦削問小翠眉山
為誰攢却斜陽院宇任蛛絲罥偏玉箏絃索戶外惟聞
放剪刀聲深在妝閣料想裁縫白苧春衫薄

女冠子

元夕

蕙花香也雪晴池館如畫春風飛到寶釵樓上一片笙
簫琉璃光射而今燈謾挂不是暗塵明月那時元夜况

年來心嬾意怯羞與蛾兒爭耍
江城人悄初更打問
繁華誰解再向天公借別殘紅
但夢裏隱隱鈿車羅
帕吳箋銀粉砑待把舊家風景
寫成閑話笑綠鬟鄰女
倚窓猶唱夕陽西下

永遇樂

綠陰

清逼池亭潤侵山閣雲氣凝聚
未有蟬前已無蜨後花
事隨逝水西園支徑今朝重到
半礙醉筇吟袂除非是
鶯身瘦小暗中引雛穿去
梅簷滴溜風來吹斷放得

斜陽一縷玉子敲枰香綃落剪聲度深幾許層層離恨
淒迷如此點破謾煩輕絮應難認爭春舊館倚紅杏處

高陽臺

送翠英

燕捲晴絲蜂黏落絮天教綰住閑愁閑裏清明匆匆粉
澀紅羞燈搖縹暈茸窻冷語未闌絨影分收好傷情春
也難留人也難留芳塵滿目悠悠為問縈雲珮響還
繞誰樓別酒纔斟從前心事都休飛鶯縱有風吹轉奈
舊家苑已成秋莫思量楊柳灣西且擢吟舟

絳都春

春愁怎畫正鶯背帶絲酴醾花謝細雨院深淡月廊斜
重簾挂歸時記約燒燈夜早折盡千秋紅架縱然歸近
風光又是翠陰初夏 姹姪嚙青泣白恨玉珮罷舞芳
塵凝榭幾擬倩人付與香蘭秋羅怕知他墮策斜攏馬
在底處垂楊樓下無言暗擁嬌鬟鳳釵溜也

聲聲慢

秋聲

黃花深巷紅葉低窓淒涼一片秋聲豆雨聲來中間夾

帶風聲疎疎二十五點麗譙門不鎖更聲故人遠問誰
搖玉佩簷底鈴聲彩角聲吹月墮漸連營馬動四起
笳聲閃爍鄰燈燈前尚有砧聲知他訴愁到曉碎嚶嚶
多少蛩聲訴未了把一半分與鴈聲

金盞子

練月縈窓夢乍醒黃花翠竹庭館心字夜香消人孤另
雙鶉被他羞看擬待告訴天公減秋聲一半無情鴈正
用恁時飛來叫雲尋伴猶記杏籠煖銀燭下纖影却

佩款春渦暈紅豆小鶯衣嫩珠痕潄印芳汗自從信誤
青鸞想籠鸚鵡傳喚風刀快但剪畫簷梧桐恁剪愁斷

梅花引

白鷗問我泊孤舟是身留是心留心若留時何事鎖眉
頭風拍小簾燈暈舞對閑影冷清清憶舊遊舊遊舊
遊今在否花外樓柳下舟夢也夢也夢不到寒水空流
漠漠黃雲濕透木棉裘都道無人愁似我今夜雪有梅
花似我愁

解珮令

春晴也好春陰也好著些兒春雨越好春雨如絲繡出
花枝紅裊怎禁他孟婆合早 梅花風悄杏花風小海
棠風驀地寒峭歲歲春光被二十四風吹老棟花風雨
且慢到

虞美人

聽雨

少年聽雨歌樓上紅燭昏羅帳壯年聽雨客舟中江濶
雲低斷鴈叫西風而今聽雨僧廬下鬢已星星也悲

歡離合總無情一任階前點滴到天明

又

梳樓

絲絲楊柳絲絲雨春在冥濛處樓兒忒小不藏愁幾度
和雲飛去覓歸舟天憐客子鄉關遠借與花消遣海
棠紅近綠闌干纔捲朱簾却又晚風寒

祝英臺近

次韻惜別

柳邊樓花下館低卷繡簾半簾外天絲擾擾似情亂知
他蛾綠纖眉鵲黃小袖在何處閑遊閑翫最堪歎等

面一寸塵深玉柱網斜鴈譜字紅鴛剪燭記同看幾回
傳語東風將愁吹去怎奈向東風不管

行香子

舟宿閩灣

紅了櫻桃綠了芭蕉送春歸客尚蓬飄昨宵穀水今夜
蘭皋奈雲溶溶風淡淡雨瀟瀟銀字笙調心字香燒
料芳踪乍整還凋待將春恨都付春潮過窈娘堤秋娘
渡秦娘橋

柳梢青

游女

學唱新腔秋千梁上釵股敲雙柳雨花風翠鬆裙褶紅
膩鞋幫歸來門掩銀缸淡月裏疎鐘漸撞嬌欲人扶
醉嫌人間斜倚樓窓

霜天曉角

折花

人影窻紗是誰來折花折則從他折去知折去向誰家
簷牙枝最佳折時高折些說與折花人道須插向鬢
邊斜



詞綜卷十九

欽定四庫全書

集部
詞綜卷
二十一

詳校官庶吉士臣朱理

侍讀臣孫球覆勘

總校官檢討臣何思鈞

校對官學正臣陳木

膳錄監生臣劉宗望

欽定四庫全書

詞綜卷二十

翰林院檢討朱彝尊編

宋詞七十六首

陳允平

二十二首

周

密

五十四首

陳允平

字君衡號西麓明州人有日湖漁唱二卷

張叔夏云詞欲雅而正志之所之一為物所役則失其雅正之音近代陳西麓所作平正

亦有

佳者

摸魚兒

西湖送春

倚東風畫欄十二芳陰簾幕低護玉屏翠冷梨花瘦寂
寞小樓烟雨腸斷處悵折柳柔情舊別長亭路年華似
羽任錦瑟聲寒瓊簫夢遠羞對綵鸞舞文園賦重憶
河橋眉嫵啼痕猶濺紈素丁香共結相思恨空記繡羅
金縷春已暮縱燕約鶯盟無計留春住傷春倦旅趣暗
綠稀紅扁舟短棹載酒送春去

絳都春

鞦韆倦倚正海棠半坼不耐春寒殢雨弄晴飛梭庭院
繡簾閑梅妝欲試芳情懶翠顰愁入眉彎霧蟬香冷霞
綃淚搵恨襲湘蘭悄悄池臺步晚任紅暎杏靨碧沁
苔痕燕子未來東風無語又黃昏琴心不度春雲遠斷
腸難託啼鵲夜深猶倚垂楊二十四欄

醉江月

賦水仙

漢江露冷是誰將瑤瑟彈向雲中一曲清冷聲漸杳月
高人在珠宮暈黃輕塗腮粉艷羅帶織青葱天香吹

散珮環猶自丁東 回首杜若汀洲金鈿玉鏡何日得
相逢獨立飄飄烟浪遠羅襪羞澣春紅渺渺予懷迢迢
良夜三十六陂風九疑何處斷魂飛度千峯

又

霽空虹雨傍啼螢莎草宿鷺汀洲隔岸人家砧杵急微
寒先到簾鉤步幄塵高征衫酒潤誰煖玉香篝風燈微
暗夜長頻換更籌 應是鴈柱調箏鴛梭織錦付與兩
眉愁不似樽前今夜月幾度同上南樓紅葉無情黃花

有恨辜負十分秋歸心如醉夢魂飛越東流

清平樂

鳳城春淺寒壓花梢顫有約不來梁上燕十二繡簾空
捲去年共倚秋千今年獨倚闌干誤了海棠時候不
成直待花殘

永遇樂

玉腕籠寒翠欄凭曉鶯調新簧暗水穿苔遊絲度柳人
靜芳晝長雲南歸鴈樓西飛燕去來慣認炎涼王孫遠

青青草色幾回望斷柔腸
薔薇舊約樽前一笑等閒
辜負年光鬪草庭空拋梭架冷簾外風絮香傷春情緒
惜花時候日斜尚未成妝聞嬉笑誰家女伴又還採桑

八寶妝

望遠秋平初過雨微茫水滿烟汀亂蕙疎柳猶帶數點
殘螢待月重樓誰共倚信鴻斷續兩三聲夜如何頓涼
驟覺紈扇無情還思驂鸞素約念鳳簫鴈瑟取次塵
生舊日潘郎雙鬢半已星星琴心錦意暗懶又爭奈西

風吹恨醒屏山冷怕夢魂飛度藍橋不成

綺羅香

秋雨

鴈宇蒼寒蛩疏翠冷又是淒涼時候小揭珠簾衣潤唾
花羅綳洗曉鷺獨立衰荷遡歸燕尚棲殘柳想黃華羞
澁東籬斷無新句到重九孤檠清夢易覺腸斷唐宮
舊曲聲迷官漏滴入愁心秋似玉樓人瘦烟檻外催落
梧桐帶西風亂捎鴛鴦記畫簾燈影沉沉共裁春夜韭

探春

蘇堤春曉

上苑烏啼中洲驚起疎鐘纔度雲窈篆冷香篝燈微塵
幌殘夢猶吟芳草搔首捲簾看認何處六橋烟柳翠橈
纔艤西泠趁取過湖人少掠水風花繚繞還暗憶年
時旗亭歌酒隱約春聲鈿車寶勒次第鳳城開了惟有
踏青心縱早起不嫌寒峭畫欄閑立東風舊紅誰掃

秋霽

平湖秋月

千頃玻璃送遠目斜陽漸下林間題葉人歸採菱舟散
望中水天一色碾空桂魄玉繩低轉雲無迹有素鷗閑

伴夜深呼棹過環碧
相思萬里頓隔嬋媛幾回瑤臺
同駐鸞翼對西風憑誰問取人間那得有今夕應笑廣
寒宮殿窄露冷烟澹還看數點殘星兩行新鴈倚樓橫
笛

百字令

斷橋殘雪

凝雲泣曉正蘼花纔積
荻絮初殘華表翩跹何處鶴愛
吟人在孤山凍解苔鋪水融
莎甃誰凭玉勾闌茸衫氈
帽冷香吹上吟鞭
將次柳際瓊消梅邊粉瘦添
做十

分寒閒踏輕漸來薦菊半潭新漲微瀾水北峰巒城陰
樓觀留向月中看歎雲深處好風飛下晴湍

掃花遊

雷峰落照

數峯蘸碧記載酒紺園柳塘花塢最堪避暑愛蓮香送
晚翠嬌紅嫵款乃菱歌乍起蘭橈競舉日斜處望孤鶩
斷霞初下芳杜遙想山寺古看倒影金輪遡光朱戶
暝烟帶樹有投林鷺宿凭樓僧語可惜流年付與朝鐘
暮鼓漫凝佇步長橋月明歸去

鷺山溪

花港觀魚

春波浮淙小隱桃溪路烟雨正林塘翠不礙錦鱗來去
片香藻膩偏愛鯉花肥簷影下柳陰中逐浪吹萍絮
宮溝泉滑怕有題紅句釣餌已忘機都付與人間兒女
濠梁興在鷗鷺笑人癡三湘夢五湖心雲水蒼茫處

齊天樂

南屏晚鐘

赤欄橋畔斜陽外臨江暮山凝紫戲鼓纔停漁榔乍歇
一片芙蓉秋水餘霞散綺正銀鑰停關畫橈催艤魚板

敲殘數聲初入萬松裏
坡翁詩夢未老翠微樓上月
曾共誰倚御苑烟花宮斜露草幾度西風彈指黃昏盡
也有眠月閒僧醉香遊子驚嶺猿啼喚人吟思起

明月引

和白雲趙宗簿

雨餘芳草碧蕭蕭暗春潮蕩雙橈紫鳳青鸞舊夢帶文
簫綽約珮環風不定雲欲墮六銖香天外飄相思為
誰蘭恨銷渺湘魂無處招素紈猶在真真意還倩誰描
無鏡空懸羞對月明宵鏡裏心心裏月君去矣舊東風

新畫橋

唐多令

吳江道上寄鄭可大

何處是秋風月明霜露中
萸淒涼未到梧桐曾向垂虹
橋上看有幾樹水邊楓
客路怕相逢酒濃愁更濃數
歸期猶是初冬欲寄相思無好句
聊折贈鴈來紅

又

休去採芙蓉秋江烟水空
帶斜陽一片征鴻欲頓閒愁
無頓處都著在兩眉峰
心事寄題紅畫橋流水東斷

腸人無奈秋濃回首層樓歸去嬾早新月挂梧桐

戀繡衾

細桃紅淺柳褪黃燕初來宮漏漸長任日轉花梢也倚
蘭屏猶未試妝秦鸞舊曲無心理憶年時相傍採桑
聽綠樹嬌鶯囀一聲聲都是斷腸

又

銀鴛金鳳畫暗銷曉簾櫳新翠漸交莫多少相思恨被
東風吹上柳梢羅窓夜夜梨花瘦奈月明香夢易遙

便擬倩題紅句趁落花流過謝橋

小重山

岸柳黃深綠漸饒林塘初雨過漲蒲萄秋千亭榭彩旗
交鶯聲裏春在杏花梢 慵整翠雲翹眉尖愁兩點倩
誰描斜陽芳草暗魂銷東風遠猶凭赤欄橋

慶春宮

斜日明霞殘虹分雨軟風淺掠蘋波聲冷瑤笙情疎寶
扇酒醒無奈秋何彩雲輕散漫敲缺銅壺浩歌眉痕留

怨依約遙峯學斂雙蛾 銀牀露洗涼柯屏掩香銷忍
埽裯羅楚驛梅邊吳江楓畔庾郎從此愁多草蛩喧砌
料催織回文鳳梭相思遼遠簾卷翠樓月冷星河

垂楊

懷古

銀屏夢覺漸淺黃嫩綠一聲鶯小細雨輕塵建章初閉
東風悄依然千樹長安道翠雲鎖玉窓深窈窕斷橋人空
倚斜陽帶舊愁多少 還是清明過了任烟縷露條碧
纖青嬾恨隔天涯幾回惆悵蘇堤曉飛花滿地誰為掃

甚薄倖隨波縹緲啼鵲不喚春歸人自老

周密

字公謹濟南人僑居吳興自號弁陽翁又號蕭齋有草窗詞二卷一名蘋洲漁笛譜

大聖樂

東園餞春

嬌綠迷雲倦紅顰晚嫩晴芳樹漸午陰簾影移香燕語
夢回千點碧桃吹雨冷落錦衾歸後記前度蘭橈停翠
浦凭欄久謾凝竚鳳翹慵聽金縷留春問誰最苦奈
花自無言鶯自語對畫樓殘照東風吹遠天涯何許怕
折露條愁輕別更烟暝長亭啼杜宇垂楊晚但羅袖暗

沾飛絮

花犯

水仙花

楚江湄湘娥乍見無言灑清淚
淡然春意空獨倚東風
芳思誰記凌波路冷秋無際
香雲隨步起謾記漢宮仙
掌亭亭明月底
冰絃寫怨更多情
騷人恨枉賦芳蘭
幽芷春思遠誰賞國香風味相將共歲寒
伴侶小窓淨
沉烟熏翠被
幽夢覺涓涓
清露一枝燈影裏

探春

脩門度歲

綵勝宜春翠盤消夜客裏暗驚時候剪燕心情呼盧音
語景物總成懷舊愁鬢如垂楊早穉眼漸濃如豆儘教
寬盡春衫畢竟為誰消瘦 梅浪半空如繡便管領芳
菲忍辜詩酒映竹占花臨窓卜鏡還念歲寒宮袖簫鼓
動春城競點綴玉梅金柳厮勾元宵燈前共誰攜手

瑤花
瓊花

朱鈿寶玦天上飛瓊比人間春別江南江北曾未見謾
擬梨雲梅雪淮山春晚問誰識芳心高潔消幾番花落

花開老了玉關豪傑 金壺剪送瓊枝看一騎紅塵香
度瑤闕韶華正好應自喜初識長安蜂蝶杜郎老矣想
舊事花須能說記少年一夢揚州二十四橋明月

玉京秋

烟水濶高林弄殘照晚蜩淒切碧砧度韻銀牀飄葉衣
濕桐陰露冷採涼花時賦秋雪難輕別一襟幽事砌蛩
能說 客思吟商還怯怨歌長瓊壺暗缺翠扇疎紅衣
香褪翻成銷歇玉骨西風恨最恨閒却新涼時節楚簫

咽誰倚西樓淡月

解語花

晴絲罥蜨煖蜜酣蜂重簾捲春寂寂雨萼烟梢壓闌干
花雨染衣紅濕金鞍誤約空極目天涯草色闌苑玉簫
人去後惟有鶯知得餘寒猶掩翠戶梁燕乍歸芳信
未端的淺薄東風莫因循輕把杏鈿狼籍塵侵錦瑟殘
日紅窻春夢窄睡起折枝無意緒斜倚秋千立

曲遊春

遊西湖

禁苑東風外，颺煖絲晴絮。春思如織，燕約鶯期，惱芳情
偏在翠深紅隙。漠漠香塵隔。十里亂絲叢。笛看畫船
盡入西泠閒，却半湖春色。柳陌新烟凝碧，映簾底宮
眉，堤上遊勒。輕暝籠烟，怕梨雲夢冷。杏香愁暮。歌管酬
寒食。奈蜨怨良宵岑寂。正恁醉月，搖花怎生去得。

秋霽

秋日遊西湖

重到西泠記芳園，載酒畫舸橫。水曲芙蓉渚邊，鷺鷥
依依似舊相識。年華易失，段橋幾換，垂楊色。謾自惜愁

損庾郎雙鬢點華白
殘蛩露草怨蜨飛花轉眼西風
又陳迹歎如今才消量減樽前辜負醉吟筆欲寄遠情
秋水隔舊遊空在凭高望極斜陽亂山浮紫暮雲凝碧

臺城路

梅

宮簷融暖晨妝懶輕霞未勻酥臉倚竹嬌顰臨溪瘦影
依約樽前重見盈盈笑靨映珠絡玲瓏翠綃蔥蒨夢入
羅浮滿衣清露暗香染東風千樹易老怕紅顏旋減
芳意偷變贈遠天寒吟香夜永多少江南新怨瓊梳靜

掩任剪雪裁雲競誇輕艷畫角黃昏夢隨春去遠

又

東風又入江南岸年年漢宮春早寶屑無痕生香有韻
消得何郎花惱孤山夢繞記路隔金沙那回曾到夜月
相思翠樽誰共飲香醪天寒宮怨贈遠水邊憑為問
春到多少竹外凝情牆陰照影誰見嫣然一笑冷香未
了怕玉管西樓一聲霜曉花自多情看花人自老

又
赤壁重遊

清溪數點芙蓉雨蘋颺涼泛吟鷁洗玉空明浮珠沆瀣
人靜籟沉波息仙潢咫尺想翠羽瓊樓有人相憶天上
人間未知今夕是何夕此生此夜此景自仙翁去後
清致誰識散髮吟商簪花弄水誰伴空江橫笛流年暗
惜怕一度西風井梧吹碧底事聞愁醉歌浮大白

又

曲屏遮斷行雲路西樓怕聽疎雨硯凍凝華香寒散霧
呵筆慵題詩句長安倦旅歎衣染塵痕鏡添秋縷過盡

飛鴻錦箋誰與寄愁去
簫臺應是怨別晚寒梳洗懶
依舊眉嫵酒滴爐香花園坐暖閒却珠鞦韆柱芳心謾
語恨柳外遊鶯繫情何許暗卜歸期細將梅蕊數

又
蟬

槐陰忽送清商怨依稀正聞還歇寫怨聲長危絃調苦
前夢蛻痕枯葉傷情惜別是幾度斜陽幾回殘月轉眼
西風一襟幽恨向誰說輕鬟猶記動影翠蛾應妒我
雙鬢如雪枝冷頻移葉疎猶抱肯負好秋時節淒淒切

切漸迤邐黃昏砌蛩相接露洗餘悲暮烟聲更咽

一枝春

酒邊聞歌和韻

淡碧春姿柳眠醒似怯朝來疎雨芳程乍數喚起探花
情緒東風尚淺甚先有翠嬌紅嫵應自把羅綺圍春占
得畫屏春聚留連繡叢深處愛歌雲裊裊低隨香縷
瓊窻夜暖試與細評新譜妝眉媚粉料無奈弄顰佯妒
還只怕簾外籠鶯笑人醉語

又

春晚和韻

簾影移陰杏癰寒乍濕西園絲雨芳期暗數又是去年
心緒金花謾剪倩誰畫舊時眉嫵空自傷楊柳風流淚
滴軟綃紅聚羅窓那回歌處歎庭花倦舞香銷冰縷
樓空燕冷碎錦懶尋底譜么絃謾賦曾記是倚嬌成妒
深院悄門掩梨花倩鶯寄語

綠蓋舞風輕

白蓮

玉立照新妝翠蓋亭亭凌波步秋漪真色生香明璫搖
淡月舞袖斜倚耿耿芳心奈千縷晴絲縈繫恨開遲不

嫁東風顰怨嬌蕊 花底謾卜幽期素手採珠房粉艷
初洗雨濕鉛腮碧雲深暗聚軟銷清淚訪藕尋蓮楚江
遠相思誰寄棹歌回衣露滿身花氣

玲瓏四犯

戲調夢窓

波暖塵香正嫩日輕陰搖蕩清晝幾日新晴初展綺窓
紋繡年少忍負才華儘占斷艷歌芳酒奈翠簾蜨舞蜂
喧催趁禁烟時候 杏腮紅透梅鈿皺燕歸時海棠廝
勾尋芳較晚東風約還約劉郎歸後憑問柳陌情人比

似垂楊誰瘦倚畫欄無語春恨遠頻回首

拜星月

春暮寄夢窓

膩葉陰清孤花香冷迤邐芳洲春換薄酒孤吟悵相如
遊倦想人在絮幕香簾凝望誤認幾許烟檣風幔芳草
天涯負華堂雙燕記簫聲淡月梨花院研箋紅謾寫
東風怨一夜花落鵲啼喚四橋吟伴蕩歸心已過江南
岸清宵夢遠逐飛花亂幾千萬絲縷垂楊繫春愁不斷

長亭怨慢

記千竹萬荷深處綠淨池臺翠涼亭宇醉墨題香閒簫
橫玉畫吟趣勝流星聚知幾誦燕臺句零落碧雲空歎
轉眼歲華如許凝佇望涓涓一水夢到隔花窻戶十
年舊事儘消得庾郎愁賦燕樓鶴表半飄零莫惟有盟
鷗堪語慢倚遍河橋一片涼雲吹雨

宴清都

雪川圖

老去閒情懶東風外霏霏花絮零亂輕鷗漲綠啼鵲暗
碧一春過半尋芳已是來遲怕迤邐年華暗換還應恨

白雪歌空秋霜鬢冷難管

凭欄自笑清狂事隨花謝

愁與春緩持盃顧曲登樓賦筆杜郎才減前歡已隔前
溪但耿耿臨高望眼遡輕紅一棹歸時半蟾弄晚

霓裳中序第一

湘屏展翠疊恨入宮溝流怨葉缸冷金花暗結又鴈影
帶霜蛩音淒月珠寬腕雪歎錦箋芳字盈篋人何在玉
簫舊約恐對素娥說愁絕衣砧幽咽任帳底沉烟漸
滅紅蘭誰採贈別悵洛浦分綃漢皋遺珮舞鸞光半缺

最怕聽離絃
乍闌憑欄久
一庭香露桂影弄淒蛻

惜餘春慢

避暑和韻

紺玉波寬碧雲亭小
冉冉水花香細魚牽翠帶燕掠紅
衣雨窻萬荷喧睡
臨檻自採瑤房鉛粉沾襟雪
絲紫指喜嘶蟬樹遠盟鷗鄉近
鏡奩光裏簾戶悄竹色侵棋
槐陰移漏晷永簾花鋪水清眠
乍足晚浴初慵瘦約楚裙尺二
曲砌虛庭夜深月透龜紗涼生
蟬翅看銀潢瀉露金井鴉啼漸起

祝英臺近

攬秀園

倚玲瓏尋窈窕瑤草四時碧小小蓬萊花氣透簾隙幾
回翠水荷初蒼崖梅小綺寮掩玉壺春色柳屏窄芳
檻日日東風幾陣吹吟筆曲折花房鶯燕似曾識最憐
燈影纔收歌塵初靜畫樓外一聲秋笛

又

后溪次韻日照堂主人

殢餘醒尋舊雨愁與病相半綠意陰陰絲竹靜深院絕
憐事逐春移淚隨花落似剪斷蛟房珠串喜重見為

誰倦酒慵持簫屏掩雙扇白髮潘郎羞見看花伴可堪
好夢殘時新愁生處烟月冷子規聲斷

徵招

九日有懷楊守齋

江離搖落江楓冷霜空鴈程初到萬景正悲秋奈曲終
人杳登臨嗟老矣問古今清愁多少一夢東園十年心
事恍然驚覺腸斷紫霞深知音遠寂寂怨琴淒調短
髮已無多怕西風吹帽黃花空自好問誰識對花懷抱
楚山遠九辨難招更晚烟殘照

聲聲慢

柳花

燕泥沾粉魚浪吹香芳堤十里新晴靜惹遊絲花邊裊
裊扶春多憐漂泊記章臺曾挽青青堪愛處是撲簾嬌
嫩隨馬輕盈長是河橋三月做一番晴雪惱亂詩魂
帶雨沾衣羅襟點點離痕休綴潘郎鬢影怕綠窻年少
人驚卷春去剪東風千縷碎雲

又

送王聖與次韻

瓊壺敲月白髮簪花十年一夢揚州恨入琵琶小憐重

見灣頭樽前漫題金縷奈芳情已逐東流還送遠甚長
安亂葉都是閒愁次第重陽近也看黃花綠酒只合
遲留脆柳無情不堪重繫行舟百年正消幾別對西風
休賦登樓怎去得怕淒涼時節團扇悲秋

醉落魄

洪魯仲之江西書以為別

寒侵徑葉鴈風擊碎珊瑚屑涼閒試霜晴帖頌菊騷
蘭秋事正奇絕故人又作江西別書樓虛度中秋節
碧欄倚遍誰人說愁是新愁月是舊時月

水龍吟

燕翎誰寄愁箋天涯極望王孫草新烟換柳光風浮蕙
餘寒尚峭倚杖看雲剪燈聽雨幾番詩酒歎長安倦客
江南舊恨飛花亂清明後堤上斜陽風驟散香綿輕
沾吟袖麴塵兩岸紋波十里暖蒸香透海濶雲深水流
春遠夢魂難勾問鶯邊按譜花前覓句解相思否

又

舞紅輕帶愁飛寶鞦暗憶章臺路吟香醉雨吹簫門巷

飄梭院宇立盡殘陽眼迷晴樹夢隨風絮歎江潭冷落
依舊恨人空老柳如許錦瑟年華暗度賦行雲空
題短句晴絲繫燕么絃彈鳳文君更苦烟水流紅暮雲
凝紫是春歸處悵江南望遠蘋花自採寄將愁與

又 白蓮

素鸞飛下青冥舞衣半惹涼雲碎藍田種玉綠房迎曉
一奩秋意擎露盤深憶君涼夜暗傾鉛水想鴛鴦正結
梨雲好夢西風冷還驚起應是飛瓊仙會倚涼颺碧

簪斜墜輕妝鬪白明璫照影紅衣羞避霽月三更粉香
千點靜聞十里聽湘絃奏徹冰綃偷剪聚相思淚

天香

龍涎香

碧腦浮冰紅薇染露驪宮玉唾誰搗麝月雙心鳳雲百
和寶釧佩環爭巧濃熏殘炷疑醉度千花春曉金餅著
衣餘潤銀葉透簾微裊素被瓊篝夜悄酒初醒翠屏
深窗一縷舊情空趁斷烟飛繞羅袖餘馨漸少悵東閣
淒涼夢難到誰念韓郎清愁漸老

珍珠簾

琉璃簾

寶堦斜轉春宵翳雲屏
啟霞卷東風新霽光照萬里寒
曳冷雲垂地暗憶連昌遊冶事
照炫轉熒煌珠翠難比
是鮫人織就冰綃清淚
猶記夢入瑤臺正玲瓏透月
瓊扉十二細縷逗濃香
接翠蓬雲氣縞夜梨花生煖白
浸潏灩一池春水乘醉悅歸時
人在明河影裏

疎影

梅影

冰條凍葉又橫斜
照水一花初發素壁秋屏
招得芳魂

彷彿玉容明滅疎疎滿地珊瑚冷全誤却撲花幽蝶甚
美人忽到窓前鏡裏好春難折 閒想孤山舊事浸清
漪倒映千樹殘雪暗裏東風可慣無情攪碎一簾香月
輕妝誰寫崔徽面認隱約烟綃重叠記夢回紙帳殘燈
瘦倚數枝清絕

玉漏遲

題吳夢窓霜花腴詞集

老來歡意少錦鱗去紫簫聲杳怕展金奩依舊故人懷
抱猶想烏絲醉墨驚醉語香紅圍繞閑自笑與君共是

承平年少 雨窓短夢難憑是幾調宮商幾番吟嘯淚
眼東風回首四橋烟草載酒倦遊處已換却花間啼鳥
春恨悄天涯暮雲殘照

南樓令

開了木芙蓉一年秋已空送新愁千里孤鴻搖落江蘼
多少恨吟不盡楚雲峯往事夕陽紅故人江水東翠
衾寒幾夜霜濃夢隔屏山飛不去隨夜鵲繞疎桐

西江月

波影暖浮玉甃柳陰深鎖金鋪湘桃花褪燕調雛又是
一番春暮碧柱情深鳳怨雲屏夢淺鶯呼繡窓人倦
冷熏爐簾影搖搖亭午

又

茶蘼閣

花氣半侵雲閣柳陰近隔春城畫欄明月按瑤箏醉倚
滿身花影翠格素虬晴雪錦籠紫鳳香雲東風吹玉
滿閒亭二十四簾春靜

鷓鴣天

清明

燕子時時度翠簾柳寒猶未透香綿落花門巷家家雨
新火樓臺處處烟情默默恨慙慙東風吹動畫秋千
刺桐開盡聲聲鳥無奈春風祇醉眠

又

相傍清明晴更慳閉門空自惜花殘海棠半拆難禁雨
燕子初歸不奈寒金鴨冷錦鴛閒銀缸空照小屏山
翠羅袖薄東風悄獨倚西樓第幾欄

夜行舫

寒菊淒風棲小蜨簾櫳靜半規涼月夢不分明恨無憑
據腸斷錦箋盈篋哀角初霜寒正怯倚瑤箏暗愁難
說寶獸頻添玉蟲暗剪長記舊家時節

杏花天

瑞雲盤翠侵宮額眉柳嫩不禁愁積返魂誰染東風筆
寫出郢中春色人去後垂楊自碧歌舞夢欲尋無迹
愁隨兩槩江南北日暮石城風急

又
昭君

漢宮乍出慵梳掠關月冷玉沙飛幕龍香撥指春風弱
一曲哀絃謾託君恩薄空憐命薄青塚遠幾番花落
丹青自是難描摸不是當時畫錯

又

金池瓊苑曾經醉是多少紅情綠意東風一枕遊仙睡
換却鶯花人世漸暮色鶻聲四起正愁滿香溝御水
一色柳烟三十里為問春歸那裏

浪淘沙

芳草碧茸茸染恨無窮一春心事雨聲中
窄素宮羅寒尚峭閒倚熏籠
猶記粉牆東同醉香叢金鞍何處驟
花驄裊裊綠窓殘夢斷紅杏東風

點絳脣

南漪釣隱年存叟

午夢初回卷簾盡放春愁去
晝長無侶自對黃鸝語
絮影蘋香春在無人處
移舟去未成新句一硯梨花雨
謁金門

花不定燕尾剪開紅影幾點落英蜂翅趁日遲簾幕靜

試把翠蛾輕暈愁薄寶臺鸞鏡屈指一春將次盡歸期猶未穩

又 吳山觀濤

天水碧染就一江秋色黿戴雪山龍起蟄快風吹海立
數點烟鬟青滴一杆霞綃紅濕白鳥明邊帆影直隔
江聞夜笛

又

芳事晚數點杏鈿香淺惻惻輕寒風剪剪錦屏春夢遠

穉柳拖烟嬌軟花影暗藏深院初試輕衫并畫扇壯
丹紅未展

清平樂

曉鶯嬌咽庭戶溶溶月一樹湘桃飛茜雪紅豆相思漸
結看看芳草平沙遊韉猶未歸家自是蕭郎漂泊錯
教人恨楊花

鳳棲梧

生香亭

竹香花深連別墅曲曲回廊小小閒庭宇忽地香來無

覓處杖藜間。趣遊蜂去。老桂凝秋。森玉樹澗底。孤芳
冉冉吹詩句。一掬幽情知幾許。鉤簾半畝。藤花雨。

少年遊

宮詞擬小山

簾銷寶篆捲宮羅。蜂蜨撲飛梭。一樣春風。燕梁鶯戶。那
處得春多。曉妝日日隨春輦。多在牡丹坡。花深深處。
柳陰陰處。一片笙歌。

甘州

燈夕寄二隱

漸淒淒芳草綠。江南輕暉弄春容。記少年遊處。簫聲巷

陌燈影簾櫳月暖烘鑪戲鼓十里步香紅欹枕聽新雨
往事朦朧還是春江夢曉怕等閒愁見鴈影西東喜
故人好在水驛寄詩筒數芳程漸催花信送歸帆知第
幾番風空吟想梅花千樹人在其中

一萼紅

登蓬萊閣有感

步深幽正雲黃天淡雪意未全休鑑曲寒沙茂林烟草
俛仰今古悠悠歲華晚飄零漸遠誰念我同載五湖舟
磴古松斜厓陰苔老一片清愁回首天涯歸夢幾魂

飛西浦淚灑東州故國山川故園心眼還似王粲登樓
最負他秦鬟妝鏡好江山何事此時遊為喚狂吟老監
共賦銷憂

詞綜卷二十

欽定四庫全書

詞綜卷二十一

翰林院檢討朱彝尊編

宋詞七十首

王沂孫 三十一首

張炎 三十九首

王沂孫

字聖與號碧山又號中仙會稽人有碧山樂府二卷一名花外集

天香

龍涎香

孤嶠蟠烟層濤蛻月驪宮夜採鉛水訊遠槎風夢深薇

露化作斷魂心字紅甕候火還乍識冰環玉指一縷縈
簾翠影依稀海天雲氣幾回殢嬌半醉剪春燈夜寒
花碎更好故溪飛雪小窓深閉荀令如今頓老總忘却
樽前舊風味謾惜餘熏空篝素被

南浦

春水

柳下碧粼粼認麴塵乍生色嫩如染清溜滿銀塘東風
細參差穀紋初遍別君南浦翠眉曾照波痕淺再來漲
綠迷舊處添却殘紅幾片蒲萄過雨新痕正拍拍輕

鷗翩翩小燕簾影蘸樓陰芳流去應有淚珠千點滄浪
一舸斷魂重唱蘋花怨采香幽徑鴛鴦睡誰道湔裙人
遠

又 前題

柳外碧連天漾翠紋漸平低蘸雲影應是雪初消巴山
路蛾眉乍窺清鏡綠痕無際幾番飄蕩江南恨弄波素
韞知甚處空把落紅流盡 何時橘里蓴蘊泛一舸翩
然東風歸興孤夢遶滄浪蘋花漠漠雨昏烟暝連筒接

縷故溪深掩柴門靜只愁雙燕銜春去拂破藍光千頃

花犯

苔梅

古嬋娟蒼鬢素靨盈盈瞰流水斷魂十里歎紺縷飄零
難繫離思故山歲晚誰堪寄琅玕聊自倚謾記我綠叢
衝雪孤舟寒浪裏三花兩蕊破蒙茸依依似有恨明
珠輕委雲卧穩藍衣正護春顚顚羅浮夢半蟾挂曉么
鳳冷山中人乍起又喚起玉奴歸去餘香空翠被

露華

碧桃

紺葩乍坼笑爛熳嬌紅不是春色換了素妝重把青螺
輕拂舊歌共渡烟江却占玉奴標格風霜峭瑤臺種時
付與仙骨 閒門晝掩淒惻似淡月梨花重化清魄尚
帶唾痕香凝恁恐攀摘嫩綠漸暖溪陰簌簌粉雲飛出
芳艷冷劉郎未應認得

無悶

雪意

陰積龍荒寒度鴈門西北高樓獨倚悵短景無多亂山
如此欲喚飛瓊起舞怕攪碎紛紛銀河水凍雲一片藏

花護玉未教輕墜 清致悄無似有照水南枝已攬春
意誤幾度憑欄莫愁凝睇應是梨花夢好未肯放東風
來人世待翠管吹破蒼茫看取玉壺天地

眉嫵

新月

漸新痕懸柳澹彩穿花依約破初暝便有團圓意深深
拜相逢誰在香逕畫眉未穩料素蛾猶帶離恨最堪愛
一曲銀鈎小寶簾挂秋冷 千古盈虧休問歎謾磨玉
斧難補金鏡太液池猶在淒涼處何人重賦清景故山

夜永試待他窺戶端正看雲外山河還老桂花舊影

水龍吟

牡丹

曉寒慵揭珠簾牡丹院落花開未玉闌干畔柳絲一把
和風半倚國色微酣天香乍染扶春不起自真妃舞罷
謫仙賦後繁華夢如流水池館家家芳事記當時買
栽無地爭如一朶幽人獨對水邊竹際把酒花前剩拚
醉了醒來還醉怕洛中春色匆匆又入杜鵑聲裏

又

海棠

世間無此偶，停玉環未破。東風睡將開，半斂似紅還白。
餘花怎比，偏占年華，禁烟纔過。夾衣初試，歎黃州一夢，
燕宮絕筆，無人解看花意。猶記花陰同醉，小闌干月
高人起，千枝媚色。一庭芳景，清寒似水，銀燭延嬌綠房。
留艷夜深，花底怕明朝，小雨濛濛，便化作燕支淚。

又
落葉

曉霜初著，青林望中，故國淒涼早。蕭蕭漸積，紛紛猶墜，
門荒迥悄。渭水風生，洞庭波起，幾番秋杪。想重崖半沒，

千峯盡出山中路無人到
前度題紅杳杳遡宮溝暗
流空遠啼蜚未歇飛鴻欲過此時懷抱亂影翻窓碎聲
敲砌愁人多少望吾廬甚處只應今夜滿庭誰掃

綺羅香

屋角疎星庭陰暗水猶記藏鴉新樹試折梨花行入小
欄深處聽粉片簌簌飄堦有人在夜窓無語料如今門
掩孤燈畫屏塵滿斷腸句
佳期渾似流水還見梧桐
幾葉輕敲朱戶一片秋聲應做兩邊愁緒江路遠歸鴈

無憑寫繡箋倩誰將去謾無聊猶掩芳樽醉聽深夜雨

齊天樂

螢

碧痕初化池塘草
熒熒野光相趣
扇薄星流盤明露滴
零落秋原飛燐練裳
暗近記穿柳生涼度
荷分暝誤我
殘編翠囊空歎夢無準
樓陰時過數點倚欄人未睡

曾賦幽恨漢苑飄苔
秦陵墜葉千古淒涼
不盡何人為省
但隔水餘輝傍林殘影
已覺蕭疎更堪秋夜永

又
蟬

綠槐千樹西窓悄。慊慊晝眠驚。睡飲露身輕。吟風翅薄。
半剪冰箋。誰寄淒涼倦耳。謾重拂琴絲。怕尋冠珥。短夢
深宮向人。猶自訴憔悴。殘紅收盡。過雨晚來。頻斷續。
都是秋意。病葉難留。纖柯易老。空憶斜陽身世。窓明月
碎甚。已絕餘音。尚遺枯蛻。鬢影參差。斷魂清鏡裏。

又 前題

一襟餘恨宮魂斷。年年翠陰庭樹。乍咽涼柯。還移暗葉。
重把離愁深訴。西窓過雨。怪瑤珮流空。玉笋調柱。鏡暗

金史卷之二十一
卷二十一
妝殘為誰嬌鬢尚如許 銅仙鉛淚似洗歎移盤去速
難貯零露病翼驚秋枯形閱世消得斜陽幾度餘音更
苦甚獨抱清商頓成淒楚謾想薰風柳絲千萬縷

又

贈秋厓道人西歸

冷烟殘水山陰道家擁門黃葉故里魚肥初寒鴈落
孤艇將歸時節江南恨切問還與何人共歌新闕換盡
秋芳想渠西子更愁絕 當年無限舊事歎繁華似夢
如今休說短褐臨流幽懷倚石山色重逢都別江雲凍

結算只有梅花尚堪攀折寄取相思一枝和夜雪

三姝媚

次周公謹故京送別韻

蘭缸花半綻正西窓淒淒斷螢新鴈別久逢稀謾相看
華髮共成銷黯總是飄零更休賦梨花秋苑何況如今
離思難禁俊才都減今夜山高江淺又月落帆空酒
醒人遠彩袖烏絲解愁人惟有斷歌幽婉一信東風再
約看紅腮青眼只恐扁舟西去蘋花弄晚

又

櫻桃

紅櫻懸翠葆，漸金鈴枝深瑤堦。花少萬顆燕支，贈舊情
爭奈弄珠人老。扇底清歌，還記得樊姬嬌小。幾度相思，
紅豆都銷碧絲空裊。芳意茶蘼開，早正夜色瑛盤素。
蟾低照薦筍，同時歎故園春事已無多了。貯滿筠籠，偏
暗觸天涯懷抱。謾想青衣初見，花陰夢好。

慶清朝

榴花

玉局歌殘，金陵句絕，年年負却薰風。西鄰窈窕，獨憐入
戶飛紅。前度綠陰載酒，枝頭色比似裙同。何須擬蠟珠

作華湘彩成叢 誰在舊家殿閣自太真仙去掃地春
空朱旛護取如今應誤花工顛倒絳英滿逕想無車馬
到山中西風後尚餘數點還勝春濃

高陽臺

淺萼梅酸新溝水綠初晴節序暄妍獨立雕欄誰憐枉
度華年朝朝準擬清明近料燕翎須寄銀箋又爭知一
字相思不到吟邊 雙蛾不拂青鸞冷任花陰寂寂掩
戶閒眠屢卜佳期無憑却恨金錢何人寄與天涯信趣

東風急整歸鞭縱飄零滿院楊花猶是春前

又

西麓陳君衡遠遊未還周公謹有懷人之賦倚其歌而和之

駝褐輕裝狨羈小隊冰河夜渡流澌朔雪平沙飛花亂
拂蛾眉琵琶已是淒涼調更賦情不比當時想如今人
在龍庭初勸金卮一枝芳信應難寄向山邊水際獨
抱相思江鴈孤回天涯人自歸遲歸來依舊秦淮碧問
此愁還有誰知對東風空似垂楊零亂千絲

又

殘雪庭陰輕寒簾影霏霏玉管春葭小帖金泥不知春
是誰家相思一夜窓前夢奈個人水隔天遮但淒然滿
樹幽香滿地橫斜江南自是離愁苦况游驄古道歸
鴈平沙怎得銀箋殷勤與說年華如今處處生芳草縱
凭高不見天涯更消他幾度東風幾度飛花

掃花游

秋聲

商飈乍發漸淅淅初聞蕭蕭還住頓驚倦旅背青燈弔
影起吟愁賦斷續無憑試立荒庭聽取在何許但落葉

滿堦惟有高樹 迢遞歸夢阻正老耳難禁病懷淒楚
故山院宇想邊鴻孤唳砌蛩私語數點相和更著芭蕉
細雨避無處這閒愁夜深尤苦

又

綠陰

小庭蔭碧遇驟雨疎風剩紅如掃翠交徑小問攀條弄
藥有誰重到謾說青青比似花時更好怎知道一別漢
南遺恨多少 清晝人悄悄任密護簾寒暗迷窓曉舊
盟誤了又新枝嫩子總隨春老漸隔相思極目長亭路

香攪懷抱聽蒙茸數聲啼鳥

又

捲簾翠濕過幾陣殘寒幾番風雨問春住否但匆匆暗裏換將花去亂碧迷人總是江南舊樹謾凝竚念昔日采香人更何許芳徑攜酒處又陰得青青嫩苔無數故林晚步想參差漸滿野塘山路倦枕閒牀正好微曛院宇送淒楚怕涼聲又催秋暮

又

滿庭嫩碧漸密葉迷窓亂枝交路斷紅任處但匆匆換
得翠痕無數暗影沉沉靜鎖清和院宇試凝佇怕一點
舊香猶在幽樹 濃陰知幾許且拂簾清眠引筇閒步
杜郎老去算尋芳較晚倦懷難賦縱勝花時到了愁風
怨雨短亭暮謾青青怎遮春去

瑣窓寒

趁酒梨花催詩柳絮一窓春怨疎疎過雨洗盡滿堦芳
片數東風二十四番幾番誤了西園宴認小簾朱戶不

如飛去舊巢雙燕 曾見雙蛾淺自別後多應黛痕不
展撲蝶花陰怕看題詩團扇試憑他流水寄情遡紅不
到春更遠但無聊病酒厭厭夜月荼蘼院

又

春寒

料峭東風廉纖細雨落梅飛盡單衣惻惻再整金猊香
燼誤千紅試妝較遲故園不似清明近但滿庭柳色柔
絲羞舞淡黃猶凝 芳景還重省向薄晚窺簾嫩陰歛
枕桐花漸老已做一番風信又看看綠遍西湖早催塞

北歸鴈影等歸時為帶春歸併帶江南恨

應天長

疎簾蛺粉幽徑燕泥花間小雨初足又是禁城寒食輕
舟泛晴淙尋芳地來去熟尚彷彿大堤南北望楊柳一
片陰陰搖曳新綠重訪艷歌人聽取春聲猶是杜郎
曲蕩漾去年春色深深杏花屋東風曾共宿記小刻近
窓新竹舊游遠沉醉歸來滿院銀燭

摸魚兒

洗芳林夜來風雨匆匆還送春去方纔送得春歸了那
又送君南浦君聽取怕此際春歸也過吳中路君行到
處便快折河邊千條翠柳為我繫春住春還佳休索
吟春伴侶殘花今已塵土姑蘇臺下烟波遠西子近來
何許能喚否又只恐殘春到了無憑據煩君妙語更為
我且將春連花帶柳寫入翠箋句

聲聲慢

啼螿門靜落葉堦深秋聲又入吾廬一枕新涼西窓晚

雨疎疎舊香舊色換却但滿川殘柳荒蒲茂陵遠任歲
華冉冉老盡相如 昨夜西風初起想尊邊呼櫂橘後
思書短景淒然殘歌空扣銅壺當時送行共約鴈歸時
人賦歸歟鴈歸也問人歸如鴈也無

望梅

畫欄人寂喜輕盈照水犯寒先坼數枝雲縷鮫綃露
淺淺塗黃漢宮嬌額剪玉裁冰已占斷江南春色恨風
前素艷雪裏暗香偶成拋擲 如今眼穿故國待拈花

弄藥時話思憶想隴頭依約飄零甚千里芳心杳無消
息粉怯珠愁又只恐吹殘羌笛正斜飛半窻曉月夢回
隴驛

張炎

字叔夏猶王俊裔居臨安自號樂笑翁有玉田詞三卷鄭思肖為之序

仇仁近云叔夏詞意度超玄律呂協洽當與白石老仙相鼓吹

南浦

春水

波暖綠粼粼燕飛來好是蘇堤纔曉魚沒浪痕圓流紅
去翻喚東風難掃荒橋斷浦柳陰撐出扁舟小回首池

塘青欲遍絕似夢中芳草
和雲流出空山甚年年淨
洗花香不了新綠乍生時
孤村路猶憶那回曾到餘情
渺渺茂林觴詠如今悄前度
劉郎從去後溪上碧桃多
少

水龍吟

白蓮

仙人掌上芙蓉涓涓猶滴金盤露輕妝照水纖裳玉立
飄飄似舞幾度消凝滿湖烟月一汀鷗鷺記小舟夜悄
波明香遠渾不見花開處應是浣紗人妒褪紅衣被

誰輕誤閒情雅澹冶姿清潤憑嬌待語隔浦相逢偶然
傾蓋似傳心素怕湘皋珮解綠雲十里卷西風去

解連環

孤鴈

楚江空晚悵離羣萬里恍然驚散自顧影欲下寒塘正
沙淨草枯水平天遠寫不成書只寄得相思一點歎因
循誤了殘氈擁雪故人心眼誰憐旅愁荏苒謾長門
夜悄錦箏彈怨想伴侶猶宿蘆花也曾念春前去程應
轉暮雨相呼怕驀地玉關重見未羞他雙燕歸來畫簾

半捲

探春

雪霽

銀浦流雲綠房迎曉一抹牆腰月淡暖玉生香懸冰解
凍碎滴瑤階如霰纔放些晴意早瘦了梅花一半也知
不作花香東風何事吹散搖落似成秋苑甚釀得春
來怕教春見野渡舟迴前村門掩應是不勝清怨次第
尋芳去灞橋外蕙香波暖猶聽簷聲看燈人在深院

又

歲晚吳中作

列屋烘爐深門響竹催殘客裏時序投老情懷薄游滋味消得幾回淒楚聽鴈聽風雨更聽過數聲柔櫓暗將一點歸心試託鄉書分付試問西樓在否休忘了盈盈端正窺戶簾卸蟾水柳絮蛾雪次第滿城簫鼓聞見誰家月渾不記舊游何處伴我微吟恰有梅花一樹

高陽臺

西湖春感

接葉巢鶯平波卷絮斷橋斜日歸船能幾番游看花又是明年東風且伴薔薇住到薔薇春已堪憐更淒然萬

綠西冷一抹荒烟 當年燕子知何處但苔深韋曲草
暗斜川見說新愁如今也到鷗邊無心再續笙歌夢掩
重門淺醉閒眠莫開簾怕見飛花怕聽啼鵲

掃花遊

春飲殊鄉醉餘偶賦

嫩寒禁暖正草色侵衣野光如洗去城數里遶長堤是
柳釣船初艤小立斜陽試數花風第幾問春意待留取
斷紅心事難寄 芳信成然指甚遠客他鄉老懷如此
醉餘夢裏尚分明認得舊時羅綺可惜空簾誤却歸來

燕子勝遊地想依然斷橋流水

又 高疏寮東野園

烟霞萬壑記曲徑尋幽霽痕初曉綠窓窈窕看隨花發
石就泉通沼幾日不來一片蒼雲未掃自長嘯恨喬木
荒涼都是殘照 碧天秋浩渺聽虛籟泠泠飛下孤峭
山空翠老步仙風怕有采芝人到野色間門芳草不除
更好境深悄比斜川又清多少

渡江雲

久客山陰王菊存問予近作書以寄之

山空天入海倚樓望極風急暮潮初一簾鳩外雨幾處
閒田隔水動春鉏新烟禁柳想如今綠到西湖猶記得
當年深隱門掩兩三株 愁余荒洲古渚斷梗疎萍更
漂流何處空自覺圍羞帶減影怯燈孤長疑即見桃花
面甚近來翻致無書書縱遠如何夢也都無

又 次趙元甫韻

錦香繚繞地深燈挂壁簾影浪花斜酒船歸去後轉首
河橋那處認紋紗重盟鏡約還記得前度秦嘉惟只有

葉題堪寄流不到天涯
驚嗟十年心事幾曲闌干想
蕭娘聲價間過了黃昏時候疎柳啼鴉浦潮夜湧平沙
淨問斷鴻知落誰家書又遠空江片月蘆花

綺羅香

紅葉

萬里飛霜千山落木寒艷不招春妒楓冷吳江獨客又
吟愁句正船艤流水孤村似花繞斜陽芳樹甚荒溝一
片淒涼載情不去載愁去
長安誰問倦旅羞見衰顏
借酒飄零如許謾倚新妝不入洛陽花譜為回風起舞

樽前盡化作斷霞千縷記陰陰綠遍江南夜窓聽暗雨
清平樂

候蛩淒斷人語西風岸月落沙平江似練望盡蘆花無
鴈暗教愁損蘭成可憐夜夜閒情只有一枝梧葉不
知多少秋聲

疎影

梅影

黃昏片月似滿地碎陰還更清絕枝北枝南疑有疑無
幾度背燈難折依稀倩女離魂處緩步出前村時節看

夜深竹外橫斜應妒過雲明滅
窺鏡娥眉淡掃為容
不在貌獨抱孤潔莫是花光描取春痕不怕麗譙吹徹
還驚海上燃犀去照水底珊瑚疑活做弄得酒醒天寒
空對一庭香雪

邁陂塘

愛吾廬傍湖千頃蒼茫一片清潤晴嵐暖翠融融處花
影倒窺天鏡沙浦迥看野水涵波隔柳橫孤艇眠鷗未
醒甚占得萼鄉都無人見斜照起春暝
休重省莫問

山中秦晉桃源今度難認林間却是長生路一笑元非
捷徑深更靜待散髮吹簫鶴背天風冷憑高露飲正碧
落塵空光搖半壁月在萬松頂

甘州

錢沈秋江

記玉關踏雪事清遊寒氣敝貂裘傍枯林古道長河飲
馬此意悠悠短夢依然江表老淚灑西州一字無題處
落葉都愁載取白雲歸去問誰留楚珮弄影中洲折
蘆花贈遠零落一身秋向尋常野橋流水待招來不是

舊沙鷗空懷感有斜陽處最怕登樓

月下笛

甬東積翠山舍

萬里孤雲清遊漸遠故人何處寒窓裏曾記經行舊時
路連昌約畧無多柳第一是難聽夜雨謾驚回悽悄相
看燭影擁衾誰語張緒歸何暮伴冷落依依短橋鷗
鷺天涯倦旅此時心事良苦只愁重灑西州淚問杜曲
人家在否恐翠袖正天寒猶倚梅花那樹

臺城路

送周方山之吳

朗吟未了西湖酒驚心又歌南浦折柳官橋呼船野渡
還聽垂虹風雨漂流最苦況如此江山恁時情緒怕有
鷓鴣笑人何事載詩去荒臺祇今在否再休登望遠
都是愁處暗草埋沙明波洗月誰念天涯羈旅荷陰未
暑快料理歸程再盟鷗鷺只有空山近來無杜宇

又寄太白山人陳又新

薛濤箋上相思字重開又還重摺太白秋聲東瀛柳色
一縷輕痕輕折虛沙動月歎千里悲歌唾壺鼓缺記得

巴山此時懷抱那時說 寒香深處話別病來渾瘦損
懶賦清切笑裏移春吟邊慨古多少英游消歇迴潮似
咽送一點愁心故人天末江影沉沉夜涼鷗夢濶

又

杭友抵越適鑑曲漁舍會飲

春雲不暖垂楊柳吹却絮雲多少燕子人家夕陽巷陌
行入野畦深窈籌花鬪草記小艇尋芳斷橋初曉那日
心情幾人同向近來老 消憂何處最好夜遊頻秉燭
猶是遲了南浦歌闌東林社冷贏得如今懷抱吟悵暗

惱待醉也慵聽勸歸啼鳥怕攪離愁亂紅休去掃

又

庚辰會江蘭坡於蜀北恍然如夢回憶舊遊已十八年矣

十年舊事翻疑夢重逢可憐俱老水國春空山城歲晚
無語相看一笑荷衣換了任京洛塵沙冷凝風帽見說
吟情近來不到謝池草歡遊曾步翠窈亂紅迷紫曲
芳意今少舞扇招香歌橈喚玉猶憶錢塘蘇小無端暗
惱又幾度流連燕昏鶯曉回首妝樓甚時重去好

又

為湖天賦

扁舟忽過蘆花浦間情便隨鷗去水國吹簫虹橋問月
西子如今何許危欄慢拊正獨立蒼茫半空飛露倒影
虛明洞庭波映廣寒府魚龍吹浪自舞渺然凌萬頃
如聽風雨夜氣浮山晴暉蕩目無尋秋處驚鳬自語尚
記得當時散人來否勝景平分此心遊太古

真珠簾

近雅軒即事

雲深別有深庭宇小簾櫳占取芳菲多處花暗曲房春
潤幾番酥雨見說蘇堤晴未穩便好趁踏青人去休去

且料理琴書夷猶今古 誰見靜裏閒心縱荷衣未葺
雪巢堪賦醒醉一乾坤任此情如許茂樹石牀同坐久
又被春風留住欲住奈簾影妝樓剪燈人語

三姝媚

送舒亦山

蒼潭枯海樹正雪竇高寒水聲東去古意蕭閒問結廬
人遠白雲誰侶賀監猶存還散跡千岩風露抱瑟空游
都是淒涼此愁誰語 莫趣江湖鷗鷺怕太乙爐烟暗
銷鉛虎投老心情判歸來何事共成羈旅布襪青鞋休

悞入桃源深處待得重逢却說巴山夜雨

憶舊遊

新朋故侶醉酒遲留吳山縱橫渺渺今予懷也

記開簾送酒隔水懸燈款語梅邊未了清游興又飄然
獨去何處山川淡風暗收榆筴吹下沉郎錢歎客裏光
陰消磨艷冶都在尊前留連佳人處是鑑曲窺鶯蘭
沼園泉醉拂珊瑚樹寫百年幽恨分付吟箋故舊幾回
飛夢江雨夜涼船縱忘却歸期千山未必無杜鵑

探芳信

次周草窗韻

坐清晝正治思紫花餘醒倦酒甚探芳人老芳心尚如
舊消魂恐說銅駝事不是因春瘦向西園竹掃顏垣蔓
羅荒甃風雨夜來驟歎歌冷鶯簾恨凝蛾岫愁到今
年都似去年否賦情懶聽山陽笛目極空搔首我何堪
老却江潭漢柳

梅子黃時雨

病中懷歸

流水孤村愛塵事頓消來訪深隱向醉裏誰扶滿身花
影鷗鷺相看如一作鷺瘦近來不是傷春病嗟流景竹

相比

外野橋猶繫烟艇 誰引斜川歸興便啼鵲縱少無奈
時聽待棹擊空明魚波千頃彈斷琵琶留住最愁人
是黃昏近江風緊一行柳絲吹暝

瑣窓寒

亂雨敲春深烟帶晚水窓慵凭空簾謾卷數日更無花
影怕依然舊時歸燕定知未識江南冷最憐他樹底鶯
紅不語背人吹盡 清澗通幽徑謾移燈剪韭試溫香
鼎分吟醉裏過了幾番風信想竹間高閣半開小車未

來猶自等傍新晴隔柳呼船待教潮信穩

又

王碧山又號中仙越人也其詩清峭其詞闢雅有姜白石意趣今絕響矣八悼之

斷碧分山空簾刺月故人天外香留酒滯蝴蝶一生花
裏想如今愁魂正遠夜臺夢語秋聲碎自中仙去後詞
箋賦筆便無清致都是淒涼意悵玉笥埋雲錦衣歸
去形容憔悴料應也孤吟山鬼那知人是彈折素琴黃
金鑄出相思淚但柳枝門掩清陰候蛩愁暗葦

法曲獻仙音

聽琵琶有懷音游

雲隱山暉樹分溪影未放妝臺簾卷篝密籠香鏡圓窺
粉花深自然寒淺正人在銀屏底琵琶半遮面語聲
軟且休彈玉關愁怨怕喚起西湖那時春感楊柳古灣
頭記小憐隔水曾見聽到無聲謾贏得情緒難剪把一
襟心事散入落梅千點

西河

史元叟依綠莊賞荷

花最盛西湖曾泛烟艇開紅深處小秦箏斷橋夜飲鴛
鴦水宿不知寒如今翻被驚醒那時事都倦省闌干

來此閒凭是誰分得半機雲恍疑畫錦想當年飛燕敝
裙時舞盤微墮珠粉軟波不剪素練靜碧盈盈移下
秋影醉裏玉書難認且脫巾露髮飄然乘興一葉浮香
天風冷

長亭怨

辛卯歲會菊泉於薊北踰八年會于甬東
未載別去將復之北作此以餞

記橫簾玉關高處萬疊沙寒雪深無路敝却貂裘遠遊
歸後共誰語故人何許渾忘了江南舊雨不擬重逢應
笑我飄零如羽同去釣珊瑚海樹底事便成行旅烟

迷斷浦更幾點戀人飛絮如今又京國尋春定應被薇
花留住且莫把孤愁說與當時歌舞

又

有懷故居

望花外小橋流水門巷惜惜玉簫聲絕鶴去臺空珮環
何處弄明月十年前事愁千折心情頓別露粉風香誰
為主都成消歇淒咽曉窓分袂處同把帶鵲親結江
空歲晚肯忘了尊前曾說恨西風不庇寒蟬便掃盡一
林殘葉謝楊柳多情還有綠陰時節

西子妝

吳夢窓自製此曲余喜其聲調嫺雅久欲效而未能甲午春寓羅江陳文卿間行江上景況離離因填此詞惜舊譜零落不能

倚聲歌也

白浪搖天清陰漲地一片野情幽意楊花點點是春心
替風前萬花吹淚遙琴寸碧有誰看朝來清氣自沉吟
甚流光輕把繁華如此斜陽外隱約孤村隔塢間門
閉漁舟何似莫歸來想桃源路通人世危欄靜倚千年
事都消一醉謾依依愁落鵲聲萬里

風入松

小窗晴綠占閒波。畫影舞飛梭。惜春猶問花多少，柳陰中春已無多。乍試泥金巧扇，初裁水碧輕羅。園林未肯愛清和。人醉牡丹坡。笑歌且醉平生事，問東風畢竟如何。燕子尋常巷陌，酒邊莫唱西河。

瑤臺聚八仙

秋月娟娟人正遠。魚鴈待拂吟箋。也知遊事多在第二橋邊。花底鴛鴦深處睡，柳陰淡隔裏湖船。路綿綿夢吹舊曲如此山川。平生幾兩謝屐，便放歌自得直上風

烟峭壁誰家長嘯竟落松前十年孤劒萬里又何似畦
分抱瓮泉中山酒且醉食石髓白眼青天

南樓令

風雨客殊鄉梧桐傍小窓甚秋聲今夜偏長暗憶舊時
歌舞地誰得似牧之狂茉莉擁釵梁窩雲一枕香醉
曾騰多少思量明月半牀人睡覺聽說道夜深涼


南歌子

葉密春聲聚花多瘦影重只留一路過東風圍得生香

不斷錦薰籠 月地連金屋雲樓瞰翠蓬惺鬆語笑隔
簾櫳知是誰調鸚鵡柳陰中

浪淘沙

香霧濕雲鬢益珮珊珊酒醒微步晚波寒金鼎尚存丹
已化雪冷虛壇 遊冶未知還鶴怨空山瀟湘無夢繞
叢蘭碧海茫茫歸不去却在人間



詞綜卷二十一